

亳州志

木集

藝文志

卷之十五

墓誌

雜文

藝文志

卷之十六

賦

詩



亳州志卷之十五

藝文志五

薛考功墓碑

文徵明

先生諱蕙字君采號西原晚稱大寧居士其先河南偃師人國初以赤籍歷武平衛遂爲亳人高祖彬曾祖森祖琇世有隱德父鎰封吏部主事母楊氏封安人先生舉正德甲戌進士初授刑部貴州司主事病免起告改福建司尋吏部驗封司進員外郎再進考功司郎中卒年五十

有三先生生而靈異七歲能屬文稍長出語已驚其里中長老十五補郡學生試應天不利歸益肆力於學質義楊確雋味道腴經義之外尤攻古文詞毫故偏鄙學者無所承籍先生超出齊民能自得師不階梯級徑造作者之域今大中丞儀封王公判毫得其文竒之曰是故何李之流也亟延譽之提衡引重俾益有聞故先生未仕而其名已隱然動京師及舉進士雅遊諸公間益精進不怠初官法比文法章程披扶叢

挫而先生不忘問學群經史籍讀之幾遍見諸論撰精深典則不爲長語作詩溫深雅麗有王孟之風樂府歌詞追躅漢魏顧先生不以爲能直欲見之行事其治獄精審不爲骯髒音委而被而析律詳明所當必允嘗蒞本科凡諸司奏讞悉從詳定傳受論報旣靡罅漏而又緣飾以文條例燦然一時法家咸推之以爲能在吏部尤事甄別公清介潔銓叙惟審故事曹務惟長官關決貳佐漫不得省屬時曹長皆先生知交事必

集議先生審畫緒正每公言之在考功未久而
展采措事已卓有端緒性强執遇事直前無所
觀望武宗南狩先生抗疏諫正同時諫者或標
表宗直或解慢恐腴而先生不激不隨直伸其
志雖聖怒叵測而履坦俟命不爲回折上議追
王之禮廷臣論奏紛然上意初無固必而主議
之臣持之甚堅故諸臣徃徃得罪去先生曰是
不可以言奪也乃註爲人後解大要謂大宗不
可絕而義變則適子可以爲後又著爲人後辦

謂繼統故繼嗣而繼嗣所以繼統且禮無生而
貴者雖天子諸侯之子苟不受於君父亦不敢
自成尊也其言出入經傳援據精核而詞旨頗
激人爲之洵懼而上不爲甚忤甫下獄尋貰赦
而主議者復有陳洗者以給事中補外中道上
書議禮得復召見言事因附當路盡擊異議者
去之先生時被原無可刺者遂起顏木之獄而
先生去國矣先是毫有武臣謗謾陰賊爲暴於
境內縱橫圍奪漸不可制顏守毫盡發其奸私

深揆其獄而置之法至是稱寃下有司推劾洗以先生亳人顏其同年進士於中疑有奸利有詔勒停聽理已而事白先生乃無所坐例得牽復然先生薦罹跋扈視畏途如棘縮歛自愛不復當世爲志臺臣論薦歲無虛剡四方之士日俟其用而先生不可起矣先生恬靜寡欲舉天下之物莫有動其中者所與遊非道義不親紛華聲利之言一不出口平生未嘗以私干人人亦無敢于以私者晚歲自謂有得於老聃玄默

之言因註老子以自見詞約理明多前人所未發又喜觀釋氏諸書謂能一死生外形骸將掇其腴以求會於吾儒性命之理蓋亦閑居無事用寄其淵微深寂之趣耳所著有約言老子集解五經雜錄大寧齋實錄西原集總若干卷先生事親孝居喪復易而能戚與兄蘭雖異出而事之極恭事巨細悉主於蘭同居五十年友愛無間先生娶趙氏無子蘭實主其喪云銘曰維薛之先偃師其奕別籍於譙世載厥德顯允考

功展世斯宏載言翼之燿燿英英孰不有言我
掇其雋內澡玉融亦貞其踐踐德以升列於周
行爰飭厥躬弗愆用臧司刑則明官人維叙以
比以備以莫不舉顯允考功直躬勿拆亶摠至
誠罔私以訐天崇地卑禮攸有定匪無經權我
惟其正蹇蹇揭揭孰腴以阿豈天則高壬人孔
多彼壬則多我攸有適向晦而明迺晏以息言
考於繫履貞用恒著書滿家身否道享繫毫之
南有原惟塏我銘君藏以俟千載

薛考功墓銘

唐順之

西原先生憫學者漓於多岐作約言學者執言
銓以求見聖人之心而不能自見其心也作五
經雜說方士穿鑿乎性命之外而不知養性之
爲養生也世儒泥於有無之內而不知無爲之
爲有爲也作老子解先生之學無所不窺不名
一家中歲始好養生家言自是絕去文字收斂
耳目澄慮默照如是者若干年而卒未之有得
也久之乃悟曰此生死障耳不足以學然因是

讀老子及瞿曇氏書得其虛靜清玄之說不逆於心已而證之六經及濂洛諸書至於中庸喜怒哀樂未發之謂中曰是矣故其學一以復性爲鵠以慎獨爲括以喜怒哀樂未發爲奧以能知未發而至之爲竅自是收斂耳目澄慮默照如是者又若干年而後信乎其心其自信之確也而後著之於書嗚呼心學之亡久矣有一人焉倡爲本心之說衆且譁然而佛老詆之矣學者避佛老之形而畏其景雖精微之論出於古

聖賢者且惑而不敢信矣先生直援世儒之所最詆者以自信而不惑其特立者歟先生少嘗刻鏤於詩世絕喜其工今所傳西原集者其少作也既有志於道則棄不復爲雖爲之亦絕不復較工與否然而西原集世爭效慕之而約言老子解好者鮮矣先生以正德甲戌舉進士授刑部貴州司主事病免起爲福建司主事以才調吏部驗封主事嘉靖初先生在吏部歷考功郎中而罷後十八年辛丑正月九日以病卒於

家年五十有三其罷也坐論大禮先生自爲刑部時值武廟南巡抗疏諫禍叵測先生晏然後大禮之議起迺誤爲人後解爲人後辨奏入下獄已而復其官然已爲權貴人所不釋矣已而有給事中陳洗一作陳洸構先生罪先生上書訟坐是罷後所構事解吏部數入聲移文促先生赴官時權貴人且張甚曰是可褰裳而蹈淵也哉竟屢薦不復起先生貌臞氣清與之接不待叩其學而知其埃埽之外其行已素潔峻表裏皦然

一無所緇好惡無所假借其才雖高然坦易洞朗破去崖岸豪傑皆慕與之交其庸衆亦無嫉者獨以一二權貴人故至一斥遂不用先生方且藝圃灌花澹如也而當世咸共惜之先生居鄉絕不肯爲人干請至戚里有病親爲之檢方製藥常脫綿襖施凍者或曰焉得人人而濟之先生曰吾不愧此心耳先生始號西原居士後扁其齋曰大寧齋更號大寧齋居士而世猶稱西原先生云薛氏故隸偃師國初以戍武平遂

爲亳人祖琇父鎰封吏部主事自封主事君而上皆不顯然世推長者妣楊安人生三子先生其仲與其季萱皆無子而伯兄蘭有一子曰存先生與兄蘭友愛甚篤其沒也蘭爲之主其喪將葬於亳城南先塋之次請銘於余乃竊取先生致虛極守靜篤未發之中而爲之銘曰在昔老聃握元化樞人皆競巧已多若愚吾師歎焉其猶龍乎棼於末學枝葉日繁豈不苑然而揆其根維聃之生實自譙亳寂寥至今西原有作閉戶獨窺微言五千叅諸孔庭獲我同然孔曰未發聃曰靜虛立教有主其究豈殊自是返躬精思力踐默然一悟隨天遊行亳之南墟有鬱其墳嗚呼西原其尙有存

王仁子墓表

張 爾

淮以西河以南麗於龍興之都而爲州者曰亳古湯王氏之所居也其俗好風雅而多文人其民淳龐而修君子長者之行其杰然最著曰明經仁子王君君十五而補諸生以高才異等廩

於庠九試不第而以恩選貢於廷既選入天官
氏爲之日曰士也儒且德而嫻於政百里器也
格宜令屬需次補一邑旣歸而晚且倦於仕遂
咏歌讀書施行其德以老故亳人皆曰君文人
又曰君仁人君之文章不大顯于時而所著有
嬾園集上下卷其志氣凋儻不獲試於用而感
時艱物托事比興見於登覽吟咏諸篇其德澤
不究於人仁心未博於濟而能任俠好義不私
其財急宗黨隣里之困而不求其報其事親孝

與人交信醇心一意皎如日月屋漏不欺蓋真
讀書能見諸躬行者令微半通之輪備剗割之
列如决河而潤千里縱大壑而凌風波雖古循
吏以文章飭吏治者當不是過而名不出於閭
黨行不越於庭除君子惜之按狀君節似魯男
子温克鎮默類萬石君趨難急病如原嘗陳孟
公嘗暮夜却主人婦之叩門深秘不對詹學師
之咨訪粥饑民掩暴骸廣施藥石以起疫癘之
瘡其懷仁負義純白不滓而不伸其用可嘆也

士也藻績詩書鼓吹文史習一家言以自鳴猶
曰如枯竹空言無益利濟若乃敦崇行誼使鄉
人慕義無窮食德者歌天和感恩者誦不朽古
人標炳其文金玉其德卽生前之口碑豈不爲
千秋之永譽昔人云顏子不著一書不病其缺
於文章不仕一官不病其缺於事業其修之者
素而實大聲鴻有以也君世系生葬年月具誌
狀中故不備載以其文學德行不愧古聖賢之
遺風故采其大者表之隧道使來者知所式焉

明處士明公配節婦芮孺人合葬墓誌銘

王寰洽

嗟夫此明節婦芮孺人合葬明處士墓也按狀
公諱洞字哲夫始祖諱遠者勝國時由苑馬判
改文階得百戶予世國初徙鎮亳遠生達達子
三綬紀緩緩生昆及父杲娶於甘生公公少秀
穎書能備諸體二十年而節婦歸焉天性故勤
惠閭以內蒸蒸罔間亡何而公告變二女離襁
子才兩月娘孺人拊膺與公訣曰若生男吾不

令若斬然抱恨生女且從汝地下汝須我因抱
首痛是夕公歿實戊午三月也孺人幾絕者屢
強爲公貌曰異日腹中藐孤得一當生面九月
果舉子孺人大痛曰天乎乃不令吾夫一提携
死也日夜抱孤朝遺像稍長親爲授書芮故世
伐母少慧識字知大義云家析產以其孤也而
漁之已又姑嫜歿業益落益貧孺人躬績紡軋
軋至丙夜手爲龜熒熒燈火一未亡人與藐孤
影相弔也飲泣茹荼不啻自口得一甘必獻公

而後分諸孤蓋五十年如一日焉撫弱孤絕憐
若長安君有不惠卽譙讓不小貸輒流涕曰若
不樹而老寡母何以見而父以故孤能自刻厲
補郡諸生孺人爲洒泣公遺像前曰若亦知兩
月腹中者備青衿稱人子乎已復歛淚曰吾有
以籍手地下矣郡長吏上其事當道爲置楔旌
焉孺人素健無恙偶患反胃諸生籲天求代竟
不起當屬纊時諸生泣呼曰孤在毋將無懼乎
孺人張目曰吾以死許而父稱未亡人四十六

年乃復懼耶兒誤矣嗟乎此豈婦女所能道哉
程嬰死於十五年之後於今爲烈彼固國士孺
人粉笄之秀未訣片語五十年如合券乍萌之
芽鬱爲葱菁九京握手兩無所恨金石可銷此
志不渝矣卽屬續數語定先慧者也嗟呼烈哉
可以風矣公生於嘉靖八年正月初五日卒於
嘉靖三十七年三月十一日得年二十九歲孺
人生於嘉靖七年五月十六日卒於萬曆三十
一年五月十二日年七十五歲女二一適芮國

一適芮階皆先孺人卒諸生名朝望娶於芮繼
祖氏孫男三德明德盛德新將以上三十一年
十一月初八日合塋於亳之西祖塋之次而諸
生來請銘

銘曰胡爲而皤然者母之歸真胡爲而黜然
者公之游魂未亡者亡常存者存翠栢猶彫
白日爲昏萬年斯安繩繩子孫

劉公墓誌銘

國朝 姜宸英

公諱承明字紹宇本姓竇氏原籍山西沁水縣

祖玉禹公由舉人歷任河南懷慶府太守父文學璉溪公太守爲吏廉卒於官文學貧不能歸塋有女弟劉孀居同僑寓鹿邑未幾文學夫婦相繼逝鹿邑時公甫三歲劉遂挈爲已子因姓劉氏公亦事姑妹如母更十年姑妹終哭踊之節衰苴之數不異於所生而其於本宗念之尤甚撫一弟教之讀書至成立弟沒撫其孤亦如之雖遷家於亳還至沁水掃除邱壠立祭田合族以食訪諸親族之貧者贈卹之尤厚其所至

視鄉里之疾痛飢寒凡力之所得爲者不以靳其力於人凡財之所可賙給者不以私其財於已故設施所及人鮮不獲其濟而當時之稱善人未有先公者世途缺陷人生少得自遂公少遭離亂中年肥遁優游泉石訓課子弟晚更身膺

封秩綿壽九十及享太平之盛何其幸也其卒以康

熙三十七年六月甲子

單思敕封徵仕郎行人司行人

男世沛候選教諭次恩沛行人司行人女三張
瑞張斐郭天培其婿孫三曾孫一蓋先王因生
以賜姓胙之土而命之氏姓氏之由來尙矣自
漢初有改姓濫觴於射陽奉春混淆極於唐末
五代之際甚矣其因事避難依親串冒他姓者
比比也至若幼稚失怙受人之恩勤鞠養彼旣
無子不忍自還其宗不失爲仁厚之意然譜牒
不明或至散佚則木本水源之思爲人後者能
無痛乎故大行君從余乞銘欲使子孫百世知

所從來尤仁厚之至也而余不可以無詞銘曰
后緡自出是爲姓遷於邠金枝葉盛秉義蹈仁
履險正旣安而穰考終命於亳之野穿厥藏魂
兮逍遙歸故鄉綿緜世祀漳流長

對儒自釋

曹毗

或問曹子曰太寶以含珍爲貴士以藏器爲峻
麟以絕迹標竒松以負霜稱雋是以蘭生幽澗
玉輝千仞故子州浮滄瀾而龍蟠吳季忽萬乘
以解印虞公潛崇巖以願神梁生適南越以保

慎固能全真養和夷跡洞庭陵冬揚芳披雪獨
振也今子少晞冥風弱挺秀容竒發幼齡翰披
孺童吐辭則藻落楊班抗心則志擬高鴻味道
則理貫莊肆研妙則穎奪豪鋒固有以騰廣莫
而萋蒨排素薄而青葱者矣何心以刑禮爲已
任申韓爲宏通旣登東觀染史筆又據太學理
儒功曾無立韻淡泊逆氣虛洞養采幽翳晦明
蒙籠不追林栖之迹不希抱鱗之龍不營練真
之術不慕內聽之聰而處汎位以核物扇塵教

以自濛負鹽車以顯能飾一已以求恭退不居
漆園之場出不躡曾城之衝游不踐綽約之室
趨不希駟駟之蹤徒以區區之懷而整名目之
典覆蕢之量而塞北川之洪檢名實於俄頃之
間定得失於一管之鋒子若謂我果是邪則是
不必以合俗子若云俗果非邪則俗非不可以
苟從俗我紛以交爭利害渾而瀾重何異執朽
轡以御逸駟承勁風以握秋蓬役恬性以克勞
府對群物以耦怨雙者乎子不聞乎終軍之穎

賈生之才拔竒山東玉映漢臺可謂響播六合
聲駭嬰孩而見毀絳灌之口身離狼狽之灾由
此言之名爲實賓福萌禍胎朝敷榮華夕歸塵
埃未若澄虛心於立圃蔭瑤林於蓬萊絕世事
而儁黃錡鼓滄川而浪龍鰓者矣蒙竊惑焉主
人煥耳而笑欣然而言曰夫兩儀旣闢陰陽汗
浩五才迭用化生紛擾萬類云云孰測其兆故
不登閭風安以瞻殊目之形不步景宿何以觀
恢廓之表是以迷祖者循一往之智狷介者守

一方之矯豈知火林之蔚炎柯冰津之擢陽草
故大人達觀任化昏曉出不極勞處不巢皓在
儒亦儒在道亦道運屈則紆其清暉時申則散
其龍藻此蓋員動之用舍非尋常之所寶也今
三明互照二氣載宣立教夕凝朗風晨鮮道以
才暢化隨理全故五典克明於百揆虞音齊響
於五絃安期解褐於秀林漁父擺釣於長川如
斯則化無不融道無不延風澄於俗波清於川
方將舞黃虬於慶雲招儀鳳於靈山流玉醴乎

華閨秀朱草於庭前何有違理之患累真之嫌子徒知辯其說而未測其源明朝菌不可踰晦朔蟪蛄無以觀大年固非管翰之所述聊敬對以終篇

渦水發源考

失名

渦之源出自陰溝之菑蕩渠菑蕩渠者黃河之枝派也一名清水陰溝始亂菑蕩終別於沙而渦水出焉渦水受沙於扶溝縣爾雅云渦爲洵景純曰大水溢出別爲小水也呂忱曰洵渦水

也渦水逕大扶城西城之東北悉諸袁舊基碑字傾低羊虎碎拆唯司徒滂蜀郡太守騰博平令光碑字所存唯此其餘殆不可尋渦水又東南逕陽夏縣西又東逕邈城北城實中而西有璪郭渦水又東逕大棘城南故鄆之大棘鄉也春秋宣公二年宋華元與鄭公子歸生戰於大棘獲華元左傳曰華元殺羊食士其御羊斟不與及戰曰疇昔之羊子爲政今日之事我爲政遂御入鄭故見獲焉後其地爲楚莊王所並故

園稱曰大棘也地有楚太子建之墳及伍員釣
臺池沼俱存渦水又東逕安平縣故城北陳留
風俗傳曰大棘鄉故安平縣也士人敦養音易
以統御渦水又東逕鹿邑城北世謂之虎鄉城
非春秋之鳴鹿矣杜預曰陳國武平西南有鹿
邑亭是也城南十里有晉中散大夫胡均碑元
康八年立渦水之北有漢溫令許續碑續字嗣
公陳國人也舉賢良拜議郎遷溫令延熹中立
又東逕武平衛故城城之西南七里許有漢尙

書令虞詡碑碑題云虞君之碑諱詡字定安康
仲後爲朝歌令武都太守文字多缺不復可尋
按范曄漢書詡字升鄉陳國武平人祖爲縣獄
吏治存寬恕嘗曰于公爲里門子爲丞相吾雖
不及于公子孫未必不爲九卿故字詡曰升卿
定安蓋其幼字也魏武初封於此終以武平華
夏矣渦水又東逕廣鄉城北園稱曰襄邑有蛇
邱亭故鄉改曰廣世後漢順帝陽嘉四年封侍
中摯填爲侯國卽廣鄉也渦水又東逕苦縣西

南分爲二水枝流注於東北賴城入谷謂死渦也渦水又南東屈逕苦縣城南郡國志曰春秋之相也王莽更名曰賴陵城之四門列築馳道東起賴鄉南自南門越水直指故臺西面南門列道徑趣廣鄉道西門馳道竟屈武平北門馳道暨於北臺渦水又東而北屈至潁鄉谷水注之谷水首受渙水於襄邑縣東東逕承匡城東春秋經書夏叔彭生會晉郤缺於承匡左傳曰謀諸侯之從楚也京相璠曰今陳留襄邑西三

十里有故承匡城谷水又東南逕已吾縣故城西陳留風俗傳曰縣故宋也雜以陳楚之地故梁國寧陵縣之徙龍種鄉也以成哀之世戶至八九千冠帶之徒求置縣永元十一年陳王削地以大棘直陽縣十二年自隱隸之命以嘉名曰已吾猶有陳楚之俗焉谷水又東逕柘縣故城東地理志淮陽之屬縣也城內有柘令許君清德頌石碎字紊唯此文見碑城西南里許有漢陽種叔臺碑光和中立又有漢故樂成陵令

大尉掾許嬰碑嬰字虞卿司隸校尉之子建寧六年立餘碑文碎滅不復可觀當似司隸諸碑也谷水又東逕苦縣故城中水泛則四周隍塹耗則孤津獨逝谷水又東逕瀨鄉城南其城實中東北隅有臺偏高俗以是臺在谷水北其城又謂之谷陽臺非也谷水自此東入渦水渦水又北逕老子廟東廟前有二碑在南門外漢桓尼宮管霸祠老子命陳相邊韶作碑北有雙石闕甚整頓魏文帝黃初三年逕譙所斬闕北東

側有孔子廟廟前有一碑四面是陳相魯國孔疇建和三年立北有老君廟廟東院中有九井焉又北渦水之側又有李老母廟在老子廟北廟前有李母塚塚東有碑是永興元年譙令長沙王阜所立碑云老子生於曲渦間許慎又云渦水首受淮陽扶溝縣浪蕩渠不得至沛方爲渦水也渦水又屈東逕相縣故城南其城卑小實中邊韶老子碑云老子楚相縣人也相縣虛荒今屬苦故城猶存在賴游鄉之東渦水處其

陽然卽此城也自是無郭以應之渦水又東逕
譙縣故城北春秋左傳僖公二十二年楚成得
臣帥師代陳遂取譙城頓而還是也王莽之建
成亭也魏立譙郡沅州治沙水自南枝分北逕
譙城西而北注渦渦水四周城側城南有曹蒿
塚塚北有碑碑北有廟堂餘基尙存柱礎仍在
廟北有二石闕雙峙高一丈六尺椽櫺及柱皆
雕鏤雲炬上學恩已碎闕北有圭碑題云漢故
中常侍長樂大僕特進費亭侯曹君之碑延熹

三年立碑陰又刊石策二碑文同夾碑東西列
對兩石馬高八尺五寸石作粗拙不匹光武所
表象馬也有兄騰塚塚東有碑題云漢故潁川
太守曹君墓延熹九年卒而不刊樹碑歲月墳
北有其元子熾塚塚東有題碑云漢故長水校
尉曹君之碑歷大中大夫司馬長史引侍中遷
長水年三十九卒延熹六年造熾弟胤塚塚東
有碑題云漢謁者曹君之碑熹平六年立城東
有曹太祖舊宅所在負郭對廡側墜臨水魏書

云太祖作議郎告疾歸鄉里築室城外習讀書
傳秋冬射獵以自娛樂文帝以漢中平四年生
於此上有青雲如車蓋終日乃散卽是處也後
文帝以延康元年辛譙大饗父老立壇於故宅
壇前樹碑題云大饗之碑碑之東北渦水南有
譙定王司馬士會塚塚前有碑永嘉三年立碑
南二百步許有兩石柱高丈餘半下爲束竹交
文作制乃土石榜云晉故使持節散騎常侍都
督揚州江州諸軍事安東大將軍譙定王河內

溫公司馬墓之神道渦水東逕朱龜墓北東南
流逕塚南塚南枕道有碑題曰漢幽州刺史朱
君之碑龜字汨靈光初六年卒官故史別駕事
史石北平無終年化中平二年造碑陰刊故史
姓名悉薊涿及上谷北平等入渦水南東逕層
邱北邱阜獨秀巍然介立故壁壘所在也渦水
又東南逕城父縣故城沙水枝分注之水上承
沙水於思善縣世謂之漳水故有漳頭之名也
東北流逕城父故城西側城東北流入於渦渦

水又東逕下父城北郡國志曰山桑縣有下父聚者也渦水又屈逕其聚東郎山西又東南屈逕郎山南山東有垂惠聚世謂之禮城袁崧郡國志曰山桑縣有垂惠聚卽此城也渦水又東南逕渦陽城北臨側渦水魏太和中爲州治以蓋表爲刺史後罷州立郡衿禁遏成渦水又東南逕龍亢縣故城南漢建武十三年世祖封傅昌爲侯國故語曰沛國龍亢至山桑者也渦水又屈而南流出石梁梁石崩褫夾岸積石高二

丈水歷其間又東南流逕荆山而東流注也

備考詳悉文情亦幽細再加扁鍵峭刻便不下於酈道元水經註疏矣

請劉太守賞牡丹

王寰洽

伏以露洗霞明正堆錦占春之日天清氣朗恰
寒衣問俗之辰蓋自麥秀兩岐始知花有三昧
恭惟老父師台臺智雕萬品政鈞九和散荀令
之香生香不斷移河陽之色春色無邊且樂與
人同况貴能忘分尋大堤而聽高唱羨山公之

逸興誰如諳名譜而想舊遊覺六一之風流宛
在謹陬某日掃除蘭藥拂拭鶯花玉盤借露冕
之精神紅幙待香山之吟咏錦園繡段輝輝映
竹下之金龜絳幕翠鋪霏霏點花邊之玉勒筆
補天宮曲零雪色恐携來花鳥深愁倚慙行玉
坐對蕊珠偏此際李桃增重敢乞靈於東帝實
徼寵于小山擁篲鷺延迎塵雀躍

祭義烈于氏節婦文

王寰洽

噫嗟傷哉天平古今載籍之林譚節義事大都

有兩含毒裏刃捐脰絕號大棺同穴惟恐後之
一何慷慨賦詩墜崖還屍字成青陵自投車輪
速盡一何從容未有一夕中以從容爲慷慨成
千古之義如烈婦者也方宜之君以書生謬爲
守藏吏奸胥大猾利其孱嚇以乾沒貸金錢無
筭一旦刺史按籍亡數百金被重法入而環顧
立壁洗橐出一語向索諄詬立至急之則死豪
緩之則死法徘徊轉側計盡無復而烈婦楚楚
儒家子慮不能一鳴肺石又不能共豪猾戴天

亦計畫無復決計投繯同歸自矢此際卽吳兒
木腸百端交集乃宜之君方作書辭故人而烈
婦粉墨約素供食對案無異平昔焚楮辭先靈
神祇然後引首就經若旅人束裝負擔且當此
時宜之引決烈婦一刻後繼卽此一刻後遂成
其夫九幽之感而烈婦不先不後使宜之目未
瞑而念死形未冷而心灰數刻之人卽慷慨卽
從容倏然去來之際超然愛慾之波可以動天
地可以泣鬼神可以裂壯士之腸可以墮英雄

之淚故上虞死孝而烈婦死義桂娘死忠而裂
婦死義韓市死俠而烈婦死義樓中自經驛舍
痛絕死情而烈婦死義歌兒斷頭馮妻墜臺死
勢而烈婦死義東海致旱張女雨雪死冤而烈
婦死夫之冤以成其死義蓋烈婦視其夫非有
二豎之嬰金革之變非有祝融陽侯之禍徒以
負心偏迫計惟捐一死以謝皇帝此時旁觀指
髮裂背而烈婦以三十年依倚之天挽留無術
圖回方寸不可不死不能不死惟有一死謝君

以全義義在天地不朽而烈婦聲施亦不朽義
在人心不磨而烈婦之精靈亦不磨乃知此曹
羅刹兇狡不過成烈婦義耳烈婦與宜之當長
笑九京俟神理一爲洗雪然後連枝比翼了未
盡之緣而明使君方且式廬方且名里義夫韻
士歌咏表章義烈之誦萬斯年與令女無疆復
何恨哉復何恨哉某等生同里閭非有骨肉之
素葭葶之誼義激於衷涕不自已相與採江芷
與山薇而薦之烈婦其連翩從雲中來顧也

亳州志卷之十五 共二十六頁

亳州志卷之十六

藝文志六

賦

臨渦賦

魏文帝

陰高樹兮曲渦微風起兮水增波魚頡頏兮鳥
透迤雌雄鳴兮聲相和芹藻生兮散豆柯春水
繁兮發丹華

朝獻太清宮賦

唐杜甫

冬十有一月天子既納處士之議承漢繼周革

弊用古勒崇揚休明年孟諏將攄大禮以相籍
越彞倫而莫儔歷良辰而戒吉分祀事而孔修
營室主夫宗廟乘輿備夫冕裘甲子王以昧爽
春寒薄而清浮虛閭闔逗蚩尤張猛馬出騰虬
捎熒惑墮旄頭風伯扶道雷公挾翰通天臺之
雙闕警溟漲之十洲浩劫礪礪萬仙颺颺歛臻
於長樂之舍嵬入於崑崙之邱太一奉引庖犧
左右堯步舜趨禹馳湯驟鬱悶宮之律萃拆元
氣以經構斷紫雲而竦墻撫流沙而承雷紛墮

珠而陷碧燿音醕波錦而浪繡森青冥而欲雨斲
光炯而初晝於是翠蕤俄的藻籍舒就祝融擲
火以焚香溪女奉盤而盥漱羣有司之望幸辨
名物之難究瓊漿自閔於染盛羽客先來於介
胄爍聖祖之儲祉敬雲孫而及此詔軒轅使合
符敕王喬以視履積昭感於嗣續棊正辭於祝
史若肸鬻而有憑肅風颺而乍起揚流蘇於浮
柱金英霏而披靡擬雜珮於曾巔芝蓋歌以颯
纒音中從從以回復外蕭蕭而未已上穆然注

道爲身覺天傾耳陳僭號於五代復戰國於千
祀曰嗚呼昔蒼生纏孟德之禍爲仲達所愚鑿
齒其俗窳窳其孤赤烏高飛不肯止其屋黃龍
哮吼不肯負其圖伊神器臬兀而小人响喻曆
紀大破創夷未蘇尙攫拿於吳蜀又顛蹶於羯
胡縱羣雄之發憤誰一統於亨衢在拓跋與宇
文豈風塵之不殊比聰鬼及堅特渾貔豹而齊
驅愁陰鬼嘯落日梟呼各擁兵甲俱稱國都且
耕且戰何有何無惟累聖之徽典恭淑慎以允

緝茲火土之相生非符讖之備及煬帝終暴叔
寶初襲編簡尙新義旗爰入旣清國難方覩家
給竊以爲數子自誣敢貞乎五行攸執而觀者
潛晤或喜至於泣鱗介以之鳴虛昆蛟以之振
蟄感而遂通罔不具集仡神光而糾閭羅詭異
以戢香地軸傾而融曳洞宮儼以嶷岌九天之
雲下垂四海之水皆立鳳鳥威遲而不去鯨魚
屈矯以相吸掃太始之含靈卷殊形而可挹則
有虹蜺爲鈎帶者入自於東揭莽蒼履崆峒素

髮漠漠至精濃濃條弛張於巨細覬披寫於心胸蓋脩竿無隙而仄席已容裂手中之黑簿睨堂下之金鐘得非擬斯人於壽域明返樸於玄蹤忽翳日而翻萬象卻浮雲而留六龍咸警跖而壯茲應終蒼黃而昧所從上猶色若不足處之彌恭天師張道陵等洎左玄君者前千二百官吏謁而進曰今王巨唐帝之苗裔坤之紀綱上配君服宮尊臣商起數得統特立中央且大樂在懸黃鐘冠八音之首太昊斯啟青陸獻千

春之祥曠哉勤力耳目宜乎大帶斧裳故風后孔甲充其佐山稽岐伯翼其旁至於易制取法足以朝登五帝夕宿三皇信周武之多幸存漢祖之自強且近朝之濫吹仍改卜乎祠堂初降素車終勤恤其後有客白馬固漂淪不忘伊庶人得議實邦家之光臣道陵等本之於青簡揆之於縹囊列聖有差夫子聞斯於老氏好問自久宰我同科於李康敢撥亂反正乃此其所長萬神開八駿回旗掩月車奮雷騫七曜燭九垓

能事穎脫清光大來或曰今太平之人莫不優游以自得况是蹴魏踏晉批周扶隋之後與夫更始者哉

詩

短歌行

魏武帝

對酒當歌人生幾何譬如朝露去日苦多慨當以慷憂思難忘何以解憂唯有杜康青青子衿悠悠我心但爲君故沉吟至今呦呦鹿鳴食野之苹我有嘉賓鼓瑟吹笙明明如月何時可掇

憂從中來不可斷絕越陌度阡枉用相存契闊談讌心念舊恩月明星希烏鵲南飛繞樹三匝何枝可依山不厭高海不厭深周公吐哺天下歸心

芙蓉池作

文帝

乘輦夜行游逍遙步西園雙渠相漑灌嘉木繞通川卑枝拂羽蓋脩條摩蒼天驚風扶輪轂飛鳥翔我前丹霞夾明月華星出雲閒上天垂光采五色一何鮮壽命非松喬誰能得神仙遨遊

快心意保已多百年

公讌詩

曹植

公子敬愛客終晏不知疲清夜游西園飛蓋相
追隨明月澄清景列宿正參差秋蘭被長坂朱
華冒綠池潛魚躍清波好鳥鳴高枝神飈接丹
轂輕輦隨風移颺颺放志意千秋長若斯

贈白馬王彪

彪字朱虎
植之弟

曹植

謁帝承明廬逝將歸舊疆清晨發皇邑日夕過
首陽伊洛廣且深欲濟川無梁汎舟越洪濤怨

彼東路長顧瞻戀城闕引領情內傷

大谷何寥廓山樹鬱蒼蒼霖雨泥我塗流潦浩
縱橫中逵絕無軌改轍登高岡脩阪造雲日我
馬玄以黃玄黃猶能進我思鬱以紆鬱紆將何
念親愛在離居本圖相與偕中更不克俱鴟梟
鳴衡扼豺狼當路衢蒼蠅間白黑讒巧令親疎
欲還絕無蹊攬轡止踟躕踟躕亦何留相思無
終極秋風發微涼寒蟬鳴我側原野何蕭條白
日忽西匿歸鳥赴喬林翩翩厲羽翼孤獸走索

羣銜草不遑食感物傷我懷撫心長太息太息
將何爲天命與我違奈何念同生一往形不歸
孤魂翔故域靈柩寄京師存者忽復過亡沒身
自衰人生處一世去若朝露晞年在桑榆間影
響不能追自顧非金石咄嗒令心悲心悲動我
神棄置莫復陳丈夫志四海萬里猶比隣恩愛
苟不虧在遠分日親何必同衾幃然後展殷勤
憂思我疾疢無乃兒女仁倉卒骨肉情能不懷
苦辛苦辛何慮思天命信可疑虛無求列仙松
子久吾欺變故在須臾百年誰能持離別永無
會執手將何時王其愛玉體俱享黃髮期收淚
卽長路援筆從此辭

思友人詩

晉曹攄

密雲翳陽景霖潦浩庭除嚴霜彫翠草寒風振
織枯凜凜天氣清落落卉木疎感時歌蟋蟀思
賢詠白駒情隨玄陰滯心與迴飈俱思心何所
懷懷我歐陽子精義測神奧清機發妙理自我
別旬朔微言絕于耳蹇裳不足難清陽未可俟

延首出階檐佇立增想似

木蘭詩

北魏古樂府

唧唧復唧唧木蘭當戶織不聞機杼聲唯聞女
太息問女何所思問女何所憶女亦無所思女
亦無所憶昨夜見軍帖可汗大點兵軍書十二
卷卷卷有爺名阿爺無大兒木蘭無長兄願爲
市鞍馬從此替爺征東市買駿馬西市買鞍韉
南市買轡頭北市買長鞭旦辭爺娘去暮宿黃
河邊不聞爺娘喚女聲但聞黃河流水鳴濺濺

旦辭黃河去暮至黑山頭不聞爺娘喚女聲但
見燕山胡騎鳴啾啾萬里赴戎機關山度若飛
朔氣傳金柝寒光照鐵衣將軍百戰死壯士十
年歸歸來見天子天子坐明堂策勳十二轉賞
賜百千強可汗問所欲木蘭不用尙書郎願馳
千里足送兒還故鄉爺娘聞女來出郭相扶將
阿妹聞姊來當戶理紅粧小弟聞姊來磨刀霍
霍向猪羊開我東閣門坐我西間床脫我戰時
袍著我舊時裳當窗理雲髻掛鏡貼花黃出門

看火伴火伴皆驚惶同行十二年不知木蘭是
女郎雄兔脚撲搦雌兔眼迷離兩兔傍池走安
能辨我是雄雌

答譙王詩

隋于仲文

梧桐開廣苑竹苑列羣賢景差方入楚樂毅始
遊燕折角揮談柄重席吐言泉武騎初攜翰文
學正題鞭玉徽調綠綺壁散沉青田晚霞淡遠
岫落景濛長川未陪東閣賞獨咏西園篇

送王道粹知亳州

宋梅聖俞

古者二千石高車駕青驪車前陳曲蓋車後建
朱旗金鼓鳴兩旁壺漿擁通達所俯重威惠所
仰撫懊嫠景亳寶鉅屏往俾國相之國相稱疾
還正值民阻饑朝廷急恤養選守莫與宜君嘗
典海陵政績爲重推令授輒辭命大夫多飛綏
屢上不得請飭馭俄輕齎旣體堯舜仁又答稷
契知八月風漸漸高木葉披披郊原棗已剝場
圃黍可治必期寬賦歛無乃息羸疲何當過苦
縣肯暇觀舊碑

送李奉議亳州判官

陳師道

邗氏號外府藏室多異書自公有餘力一覽意
何如為學將日益受益不受誣正須高着眼濠
梁有遊魚

送李密赴亳州

蘇軾

倦輸關內粟遂請潁州符治績可稱最士民將
以蘇譙郡君命重苦縣阻風殊仙檜留陰在耳
棠印花敷行舟通遠水候騎溢長衢化日人懷
望烟雲自滿湖

昇天檜

歐陽修

青牛西出關老聃始著五千言白鹿去昇天邇
未忽已三千年當時遺跡至今在隱起蒼檜猶
依然惟能乘變化所以為神仙叅鸞駕鶴須臾
間飄忽不見如雲烟奈何此鹿起平地更假草
木相攀緣乃知神仙事渺茫真假莫辨徒自傳
雪霜不改終古色風雨有聲當夏寒境清物秀
自可愛何必詭怪窮根源

渦口

梅堯臣

秋水見灘底淺沙露浪痕白魚跳處急紅葉落
時昏帶月溯渦尾落帆防石根清淮自行盡明
日又前村

題明道宮

劉昌

寒雲漠漠草凄凄欲訪仙踪半已迷野老散分
遺地去林鳥飛上斷碑啼殘香有燼風還裊仙
樂無聲月自低駐馬徘徊成一慨壁間聊讀舊
人題

老子祠

劉昌

乘牛西去不堪招遺宅荒涼在近郊卧地有碑
牛礪角傍墻無樹鶴移巢雲開廢井丹光出月
映重關紫氣交却有道人傳舊法夜深朝禮奏
仙匏

前題

曹璉

一托仙胎八十秋生來已自雪盈頭泉枯龍井
人何在火盡丹爐檜尙留朝帝漫傳因白鹿度
關誰復見青牛惟存道德五千語我欲重將細
校讎

前題

高信

大隱曾經侍冕旒周衰道就向西遊
函關紫氣猶微瑞蜀地青牛再出頭
九井泉龍淹歲月數株老檜歷春秋
太清古殿今寥落崇道何人再創修

前題

劉咸

自從剖腹降真源白髮蒼顏世所尊
答遍殷周三三百禮著成道德五千言
霜飄龍井泉多竭雲暗丹爐火不存
惟有宮前碑篆在年年風雨長

苔痕

前題

楊翺

地入荒涼碧草萋瀨鄉仙跡望中迷
碑橫古砌雲長瑣花落空林鳥自啼
尚有丹爐藏草露空留樓閣照虹霓
一宮賸得遺踪在多少遊人爲品題

老君石像

宋德方

玉歷垂文像外傳清光下徹九重淵
安排日月歸元造把握乾坤入自然
白鹿東昇小有洞青

牛西降大羅天狂辭欲讚玄元德何異秋蛟吸百川

老君石像

姬翼夷山

浩蕩神光徹太虛主張高厚定元初大包宇宙極無外細入毫芒光有餘萬象幹旋通造化羣生出沒賴吹噓物情不許通消息動植飛潛各自知

登譙樓

明王守仁

千尺層欄倚碧空下臨谿谷散鴻濛祖陵王氣

蟠龍虎帝闕重城瑣蝮蟻客思江南唯故國雁飛天北礙長風沛歌却憶回鑿日白晝旌旗渡海東

望仙臺

賀聰譙令

獨倚西樓望太清仙家宮闕五雲平青牛老子歸無日紫氣函關舊有名願使塵襟資道浣敢言凡骨藉丹成青袍白馬終何益惆悵千秋負此生

登西臺

傅希說

野寺紅塵淨
閒門掩碧苔
偶尋青草徑
深入白雲堆
敗葉驚風戰
寒花冒雨開
人生須作樂
逝歲苦相催

其二

有客來京邸
同吾上古臺
水分平野斷
雲盡遠天開
滿目秋光老
疎林鳥韻哀
相逢拚一醉
何必問蓬萊

亳都行

王廷相

桐宮桑林古
帝國千年跡
滅石空在龍
山連陵

如朶雲無涯
渦水東流海
明皇朝元殿
魏武省稼臺
蟠螭剝白石
古棘崩蒼厓
雄豪已逐暮
雲散精靈時
向空林哀燦
燦瑤花苑紺
殿伯陽宮古
木蔽日月萬
瓦催魚龍黃
鶴秋嘹唳丹
井水崢嶸猶
龍恍惚度沙
海惟有藥草
年年生城中
連延三萬戶
中有豪家多
官府賓客懶
作遊治盤翠
幕層樓對花
樹桃花飛入
窺洞房洞房
七十紫鴛鴦
花聚仙人散
風雨迴笙合
瑟春迷茫簾
底芙蓉兒不
知上客尊臨
池纖手雪藕
絲金

盤相勸故意勤滴露金叵羅停雲玉樹歌楊花
 飛蕩煙相和黃鸝紫燕春心多元晏先生鶴斃
 衣閉門三月學著龜有書不敢獻天子擊劍徒
 爾心神飛帝德雄圖流水去五嶽勳名在何處
 若使豪華鎮相守季倫不滅平原壽悵望青牛
 紫氣紛河上公兮同出秦逸遊元圃三千闕藉
 手雲霞謝世人

送薛君采還亳

王廷相

渦上逸人蓬島客十年不見心相憶忽來彈我

邱中琴坐對風雷起秋夕手弄團風凌海波仙
 人還唱昇天歌赤霄元圃杳然去瑤草金芝奈
 爾何

約遊薛考功南園詩

顏木

暑氣林薄微市囂村野驅習靜性自澹游行古
 所娛茲村美嘉木房楹亦攸芋巖雀蔭高篠澤
 鴻還故區漠漠冰洞霧隱隱雲樹株綵鷁始睇
 浦朱華亦蒙渠中有偃虬曲堪成達士居綢繆
 余昔眷登眺君早如矧伊陰雨霽茲應景物殊

與爾共杯酒飄然謝車徒

贈薛君采

蘇祐

脩脩張仲蔚穆穆謝康樂屏跡深蓬蒿養病茹
蕭藿襟抱無煩促天地同廓落羽翮鍛鶴鸞屈
曲委龍蠖清芬挹芙蓉翠藹映蘭薄明襲老氏
常靜尋顏子樂賁玩邱園爰細豈農圃託卷舒
惟權度俯仰遂寥廓

自西野循渦曲臨眺贈同遊

薛蕙

養拙非藏器寢疴豈逃名進慚冠蓋羣退慕邱
園耕多病齒髮落屏居懷抱盈稍尋臯壤樂暫
慰蹉跎情入野緬曲折溯溪屢迴縈霜濃石道
淨水歛雲潭清煙景淡將夕汀洲逶微明疎蕪
岸篠落嘹唳川禽鳴心賞夙所重身累適已輕
豈辭疲曳倦幸與良遊并濟時謝明哲量已保
幽貞願從裘羊輩放曠終吾生

答常樂園贈和

薛蕙

西原無舊業南郭得新廬開荒築場圃改徑通
村墟達人賞我趣遠訪林間居年德非可親氣

味畧未疎傾蓋語移日縱談懷抱舒置酒瑩心
 亭促席臨清渠燃竹煮山茗炊黍薦園蔬贈詩
 借高論題榜忝名書雖榮華袞袞自顧實空虛
 平生志尋樂憂患每有餘好學謝希顏寡過願
 師遵守節欽兩龔知止企二疏惟公蘊貞鑒晤
 語復誰歟

過西城野

薛蕙

初服性已曠久疴意看疲豈謂傷淫滯偶以戀
 棲遲聿來年歲遷驟已節物移晴陽攻陰候緩
 律變暄吹晨發高闐曲夕泛清川涓白雲生幽
 沚綠水激層涯外感耳目超內尋神蘊披泛濫
 滄洲趣髣髴崑山姿揆已信薄劣遭時已磷緇
 來復雖不遠往蹇豈能追孟嘗終何逮罷歸聊
 所宜願言在勿諛援毫伸此詞

答顏使君詩

薛蕙

俗紛倦城肆放蕩懷林莽命賞來芳訊探竒協
 幽想蕭條南苑際中夏猶淒爽雨霽綠泉生風
 驚白雲上禽魚行盼睐水木坐俯仰梁棟下陰

霏房櫳遙哀響淪飄病轉劇偃蹇年日長名山
仍未去末路亦何往故人念相慰賤子擬自廣
旦日停登臨願言操几杖

瑩心亭

薛蕙

瑩心亭上逍遙客照眼池中爛熳花白苧單衣
銷暑日玉盤纖手送朝霞身閒但覺牽詩思年
老方知愛物華笑聽採蓮頻度曲驚看垂柳乍
棲鴉

澗河龍潭

薛蕙

龍潭日落鳥飛迴坐拂扁舟下釣臺尙父已無
西伯載狂奴翻使漢廷猜江湖萬里人空老宇
宙千年鳳不來忽被漁翁笑相問棹歌何事亦
悲哀

常樂園二首

一刻傅希說

馬公卿

主人愛清曠負郭起園廬杪秋宿雨霽訪隱入
郊墟古木翳町疇蕭蕭野人居栢徑轉幽窈竹
林映扶疎輕霜落羣丹獨有黃花舒鳥馴下閒
庭魚樂游深渠引滿酌村醪呼童摘青蔬登堂

考鐘鼓入室翫琴書游賞雖寄情雅意在玄虛
采真未遺俗取適不求餘尋樂君希顏知非我
愧蘧逸駕不可攀頗與功名疎故山荒樂圃行
當賦歸與

又

芳園托幽棲一徑入蒼莽數椽結衡茅取適謝
高廣碧草滋堦除竹樹列森爽籬落花枝翻畦
壟藥苗長主人箕穎儔當路稅塵鞅豈惟避煩
囂習靜抱深養道存天地先意寄羲皇上有時
情景會翛然獨來往精舍卽祇林蓬瀛漫遐想
慚子苦行役公暇一趨訪問道啟盲聾所見浮
素仰載酒園中遊兼得寓清賞

過義門

王廷

朝發亳都河暝投義門宿昏黃映村火微茫辨
叢竹坼岸傾歌聯楚艫逐臣今夜停渦江聽唱
楚謳魂欲斷蕭蕭風雨侵船窗

題瑩心亭

喬宇

瑩心復瑩心愛此一泓水心原本瑩然安藉淪

寒泚維皇肇生人一心涵萬理玉潔蘊其真鑑
空差足擬云胡物欲萌所習相近矣正如清冷
淵渾濁良有以哲人燭性初燥雪未但已虛靈
無蔽蒙方寸空明裏存存日端澄何物得爲滓
祛塵時濯纓避囂或洗耳庶幾明德心可以見
道體古學慨榛蕪頽風競浮靡關洛諸先哲教
人先敬止本原果能澈自底充實美偉哉瑩心
功大業胥此始我來憇亭中惕然發清思

訪薛君采

吳檄

清時薜蘿子岩居常閉門著書多暇日種竹已
成園我繫燕山馬同開栗里樽不辭秋色暮對
語接高論侵晨灌芳圃汲水北河濱種藥秋已
孰何愁多病身山亭下雲氣觴詠陶心神灑翰
頻見遺清風滌凡塵

夜泊渦河龍潭

吳檄

輕舟弄素月靜夜橫清渦天風毛髮亂疎星燦
明河圖經記父老冥漢年歲多淵沉三千丈湛
碧寒無波微流帶文蒸絕岸無柔莎烟如帝鴻

鏡可鑒不可磨中蟠至神物役使羣蛟鼉蛇
頭角古勁鬣誰敢劇深宮照珠貝頗費蚌與螺
何時葛陂竹化作陶公梭

田園樂

薛蕙

一徑垂楊高下數家流水東西麥隴青青雉
柴門寂寂鶯啼稚子自操井臼老農共話桑麻
採藥常隨樵客乘藍時造僧家荷鋤朝耘瓜圃
披衣夕偃蓬廬甕裏數升綠酒枕中一卷丹書
官罷交游自絕病閑棋酒相親門下惟饒飲客

坐中時有談賓

泣杖祠

張翥

蹇予承乏初脂車義門里披圖詢往事欣聞韓
孝子斯人不可作餘輝昭信史捧杖傷毋癯迸
淚若流水問君何許人云是貞源士沒也祭於
社廟貌存遺址閱歷綿歲年淒涼沒桑梓臺臣
感幽夢倉卒命葺理伏臘曾幾時尋復就傾圮
壞棟棲鼠雀頽墉走鹿豕登堂動予懷卜日爲
經始子來首六人格勤差可使堂廡復嗟峨繚

垣更透迤士女羅庭堦壺漿來遠邇廢興適無
端表章如有俟從此庇里人冥冥闡懿矩

送西原吏部歸亳州二首

崑顧夢圭

武祥

終風號朔野玄陰凝高邱六龍未廻馭寒氣凌
重裘豈無射獵心灌莽森相樛君子理舟楫眷
言思遠遊南中孤巘秀黃河受羣流登樓感崇
替俯眺二百州究彼南華旨飡霞以忘憂

高岸爲深谷溟渤成桑田貞一豈足恃疇昔共
知然漢宮有佳人媵服何娟娟榮耀備諸好嬪

御失其妍抱景向絕域沉思托幽絃珪璋在中
曲宮羽流千年白日豈不光幸哉照虞淵

讌薛吏部園居

秋城息征驂言訪高人宅密篠紫葍房寒蕤暎
雲石對牖叢藥馨循除曲泉碧坐觀日月遙匪
抱煙霞癖幸茲接清顏跂想慰疇昔冲懷做延
納妙論酬討索羽觴續蘭膏縹帙展瑤席謬加
徐孺禮深愧孔融客象外不可窮道德領玄籍

吏部近註
老子書青牛凌紫氛俗駕將安適

過薛吏部園亭談禪

曹嘉

地抱煙霞勝亭分水竹清禪因靜裡悟學向晚
來精野服輕朝列村居遠世情追隨頗有覺又
欲叩無生

送薛吏部謝病歸亳

郭維藩

謝病譙城去移家畫省違望隨雲共遠心與鳥
同飛江海名難得風塵爾獨歸星園堪習靜到
日掩郊扉

九日同何仲默出郊

薛蕙

九日登高會同人載酒來寒城一以眺秋色正
堪哀零雨晨初霽浮雲午未開南飛有鴻雁爲
爾立徘徊

夏日遊道觀

薛蕙

隔竹窺丹洞臨池坐碧沙玉梓盛石髓翠籠貯
雲芽展簟來風色吹笙上月華休論河朔飲詎
似醉流霞

重遊蕭氏園

薛蕙

野靄橫蘭徑泉聲落草堂丈夫修鴈繳童子護

魚梁釣弋亦堪老風塵綠底忙淹留不忍去日
色晚蒼蒼

義門曉行

李先芳

曙色起林鴉青天明曉霞蒹葭晞白露墟里帶
清沙老驥長途疾新鴻一字斜不知時序晚野
菊有黃花

贈董應期待御

薛蕙

同時多逐客而我獨憐君棄置勿復道淒涼不
可聞風波一流落江海遂離分他日書相及常

因西北雲

七夕共呂王二子飲薛園

李先芳

吏事何其迫秋風稍可人城南一散眺花下幾
閒身客帶烟霞色天開牛女辰迢迢銀漢上何
處是通津

春日同王劉二少府楊上舍讌薛園

久客歎迷津寒帷及早春還攜好酒伴來覓賞
心人曲奏梅花落樽開竹葉新不應五斗粟留
滯百年身

同郡伯孫對溪薛園賞牡丹

千騎下東方名園勝洛陽使君停虎竹詞客賦
羔羊春興濃於酒花封巧作王尊前途李白葉
底醉姚黃日氣團朝露霞標逗晚粧色能將國
重天下爲人芳羯鼓催何急雕欄樂未央乍看
應奪日久坐不聞香佳讌開金谷才人出洞房
睠茲明媚景宛似少年塲寄語閒蜂蝶同來入
醉鄉

輓薛考功

孝廟中興日才人滿帝庭騷壇推薛稷鴻筆炳
丹青吏部鍾天挺中都協地靈一清傳道德三
教表儀型已化丁令鶴猶占太白星谷神元不
死仙骨有餘馨林簇留題竹苔侵一草亭鳳衰
烟樹暝龍去水雲腥絕壁啼山鬼陰崖起夜霆
捫蘿開曲徑拜石讀殘銘孤塚嗟岑寂斯文空
杳冥九原如何作同著太玄經

看花臺

浮雲深鎖故侯家勝國樓臺返照斜閒過烏衣

尋里巷到來金谷少繁華種桃疑入立都觀行
樂欣逢杜曲花芳草不知遊子意相將秋色遍
天涯

秋風臺

漢武橫汾久陸沉昔人復此藉登臨當時歌舞
行雲散此日亭臺宿草深一曲秋風吹過雁孤
城斜日度寒砧不堪白首逢搖落愁絕黃金壯
士心

牡丹

薛蕙

紅紫紛紛次第稀故留國色殿春暉東皇巧思
應多少西子妖魂定是非香霧氤氳籠寶曆流
風宛轉弄仙衣白頭更覺鍾情劇忍訴清尊不
醉歸

薛園迷花塢

會隨樵者入仙家滿路香風散彩霞行到仙源
人不見却疑身在武陵花
來風軒

綠樹逶迤小徑斜明珠蕩漾水亭花一曲南薰

清入骨紅塵隔在嶺西霞

聽雪齋

爭看玉女散天花醉殺山翁白鼻騮寒色滿林
聽不盡隨風吹入郢人家

薛園臘月見梅花

獵獵天風慘物華名園今喜見梅花還同何遜
揚州與來醉錢塘處士家

二

不須笛裏弄梅花起向樽前舞鎔鋤醉把疎枝

問春信東風吹不到天涯

咏海棠

薛 蕙

醉倚雕闌倒玉壺貪看錦樹色敷腴根株海外
何年至風韻花中絕代無西子浣紗低影照文
君酤酒正當壚少陵才調難摹寫浪把胭脂汗
畫圖

同夏侍御諸公避暑桐寺

王寰洽

野寺全宜暑長松落翠微溪光林外入秋意雨
中飛白社能容酒青山共息機晚涼歸小騎雲

影上絺衣

過希夷先生祠

仙伯新宮倚碧灣
偶來繫馬獨盤桓
清秋遙憶三峯色
白石常流萬古寒
翻手乾坤藏鳳羽
廢形日月隱龍蟠
白雲不盡紅塵外
慚愧鄉人老鵝冠

送薛大年令溫陵

幔亭仙樂駐行車
帝遣雙鳧擁絳霞
民力相隨東野御
宰官應有葛洪砂
卽看兕虎爭馴雉
自

供秔田不種花
何處重歌清德昱
刺桐城外海山涯

喜巨屏楊年丈判毫

共醉曾歌擊筑傍
高風東海自映映
那期白鳳玄經就
暫領青牛紫氣鄉
影國屏星初照耀
故人草澤已輝光
題輿莫羨陳蕃事
驥足天衢萬里長

方岳定西歌

薛鳳翔

君不見日南交趾要荒外
曾以桐標分漢界
衣

服雲山有異同文身被髮風仍在卽有諸司屬
長官曾無圖籍計偏安柔遠不辭布威德負固
終恃行克殘克殘者誰陸土目獨抗王章不肯
伏當車怒臂逞螳螂據穴建牙爲虺蝮煌煌天
討大軍行投箠能令川谷平推轂轅門須渙號
授綏方嶽領專征征誅仗文武十萬親貔虎杜
預表南征孫堅稱討虜何如李牧禁中來指揮
號令風雲開一檄招來歸脅從六師批擣獲渠
魁不煩轉戰旋干戟淨掃蠻烟清絕微露布朝

飛萬里雲天子臨軒賜顏色邊疆曾未歎呼韓
連帥諸侯向賀蘭廊廟幾時行爵賞雲臺直取
畫圖看

中都道中志感

孫養粹

倦馬嘶風悲帝鄉不堪回首對斜陽先皇園廟
懸兵壘故國烟花落劍鏗月破荒村啼鳥怨霜
殘腥野鬪龍傷灑庭忠血應成碧見說常山淚

滿裳謂郡守顏
公殉難

五難詩并序

壬癸兩歲亳土不天先之以回祿繼之以
 旱蝗終之以癘疫兵寇嗟此亳民饑魄殘
 息幾無子遺矣予蒿目梓里痛心疾首漫
 賦五詩用備當道消弭軫恤者之一鑒

火

天行降燠罰祝融肆威虐日夕驚沙起怪風吹
 簾幙黃霧塞四巷赤青變城郭兒女走沸號鷄
 犬亦狂愕驚楚尙未定譌火旋騰作炎炎亦赫
 赫爛爛復燐燐飛煙迷九市烈焰吐重閣雕甍

流金蛇華表飛紅雀枯骨葬煨煤殘魂亦銷鑠
 井渴不得汲斫竹空就縛既熄忽復燃雷風日
 噴薄經旬息爨燎炮龍不敢灼哀哉千家燼鬼
 哭還如昨

兵

危城懼崩潰引領望援師士馬屯駐久牢廩費
 不貲料音料料音料朝牧馬日暮捆載歸村落剽掠
 盡郊關斷烟炊城內衣冠族佻佻困莫支官長
 畏要挾開門恣闌居牽馬繫中堂高坐捋髯髭

主人低顏色奔走施帳幃安置甫未畢盤餐敢
迂遲典衣問酒肆貼珠市甘肥亂頭羣轟飲醉
扯東隣姬冠紳爲奴隸衿秀奉卮匱小有不獲
意鞭朴交下之人生貴意氣繫辱忍無辭反覆
思寇來早是絕命時

饑

流火焦金石螟蟲食曠土四野無青草良田變
斥鹵蝗口稍餘糧旬命賫盜伍併日營一飽十
餐不得五草根與糠竅強顏充羞釜垢衣瘦面

啼呼天不應苦待死不卽死骨肉化豺虎妻有
鬻其夫子或羹其父偷兒盜主人嘲噓勸刀俎
人類相殘盡性命輕鴻羽念之摧肺肝慘慟絕
今古

疫

造化有天扎民生多乖診子子兵荒遺重罹此
瘥癘呻吟滿壁隅號哭慘天帝闔室化異物舉
族斬宗系尸蟲流戶外枕籍相蒙袂衣薪葬蒿
蓬委壑施犬彘蠅蝻腥道路烏鳶集埤垠村巫

日婆娑醫不擇三世讌會久斷絕弔唁互奔遞
今夕眼前人明朝聚鬼第陰風日慘淡何當廻
清霽

寇

皇路際傾仄民窮盜遍起么麼黃犢兒揭竿棄
耒耜狐嘯梁陳間蠶食譙宋里兒女供刀俎室
廬盡蕩燬掘地搜兒糧焚林攫鳥子孤城日合
圍烽火照遠邇郡兵空受甲畫餅無足恃佻佻
市菜傭饑寒守窮雉流氛稍退舍殘民復營壘

部方左右袒畫地南北履赭衣入城市軍吏不
敢齒非無守禦人盜鈴自掩耳養癰有時潰未
卜局終始

支園牡丹歌

本朝徐乾學

譙城連延三萬戶北枕渦流跨城父省稼臺荒
倚夕陽朝真樓圯飛朝雨惟有巍峨立武門舟
車繹絡通商賈翠幕層樓夾道傍玉管銀箏盛
歌舞支公好鶴更耽竒古寺桐宮對別圃前庭
沙棠後烏棹洛陽名花不知數河堤上已襖筵

開飛蓋千人溯澗來葡萄之盤鸚鵡杯主人揖
客相徘徊都市乍疑錦繡列神仙忽見金銀臺
美人帷帳處處設對此不欲登蓬萊美人窈窕
情何極吳脂越粉粧非一神女高唐宋玉愁宓
妃洛浦陳王憶謂是靈芸繡輦行試看飛燕雙
車入腕腕朱顏自不同啼眉墮髻慵無力晨從
綺閣罷粧梳晚向斜樓鬪顏色分明明月舞霓
裳彷彿流黃工夜織懸知十斛須明珠不難換
却青驪駒橫陳錦障舖瓊瑜何似華陽作畫圖

主人向予嘆息久此地名花到處有東自曹州
西宋中姚家爲王魏爲后當年吏部薛西原議
禮歸來植數畝從孫鴻臚曰鳳翔風流遠繼考
功後百寶欄前百樣粧樂譜龜茲不離手珊瑚
琪樹珍重深苜蓿葡萄萬里走都人車馬日紛
紛未幾百六遭陽九黃巾十萬下漳河青犢三
千圍葛口金堤已決孤城危豈有豪華鎮相守
卽看花榭久成塵曉事花師三兩人十載中原
息戰伐於今再見洛城春余聞此言舉袂起狂

呼欲碎鳥皮几花謝花開空復情桑田碧海須
史爾不見開元全盛時太真微笑明皇喜舊宮
昔有沉香亭壞道哀湍竟誰是惟餘李白清平
詞禁樂流傳教坊伎我聞歐公作守時曾因風
土成花吏千載安知單父名百年尙說熙寧始
掀髯絕倒爲君歌手持玉觴朱顏醜乞君十幅
葡萄錦紀君樂事當如何赤鳥西走玉兔起錦
屏春色將蹉跎蘭亭金谷有時歇季倫逸少豈
復多年年渦岸芳菲樹曾有徐郎攬轡過

瑞麥行爲郡侯張公壽

吳楚奇

譙民凋瘵無寧宇帝簡神君膺茲土天燭新驚
田刺賢晶燈舊識中廉苦曲江閱競崢嶸五
馬雙旌出渭城朱輪花滿春行煖繡甸風清夜
月明但知襦袴歌來晚不道靈蛇羅萬卷濯錦
雄文憶葉濤匡時令績推何玃由來人和足豐
年四野芊芊麥秀濃隴上黃雲瞻萬疊陂中碧
浪逐千重忽驚老穉羣相祝異瑞今朝產嘉穀
正值使君初度辰仙籌自此膺遐福我聞在昔

漁陽之麥秀兩岐至今賢守令名垂又聞扶風
一莖稱四穗千秋盛事人爭貴未若此日兆禎
祥七岐一枝碧琳瑯恍似華嶽玉峯齊拱向又
如雲中金鳳獨翱翔芝房寶鼎何足羨明昭嘉
慶人稀見我亦凝眸訝異珍稱觴藉供三多獻
不惜星軺煩驛使敬賚音猷上 天子天顏有
喜褒循良龍章華袞稱雙美早見舟霖列上公
還期康阜徧寰中乃知帝命來牟日不異堦翻
芍藥紅

壬午秋闈報捷

高堂卽世經多載內子拋離又幾年一紙泥金
來院宇兩行珠淚灑堦前臯魚抱恨寂寥地廷
式多情慘澹天寄語良朋休作賀寸心從此正
冰淵

南闈領解友人以詩見賀答之

八戰金陵氣未舒一朝姓字冠賢書湖山久識
真狂客風雨新騰舊蠹魚磨杵幸非同瓦礫傳
燈敢信證真如上林花鳥知多少媿領春風覲

玉除

寄劉行人雪洲

御柳宮桃拂錦鞵皇都風色此爭妍鸞臺久羨
驪珠貴仙馭遙期博望還一自飛鳧臨北地兩
年離緒隔南天何時得踐燕山約良夜青燈話
舊緣

上巳登譙樓

張昊

楔飲風流孰與齊麗譙雄覽酒人迷梁園詞賦
千金重楚國山河一望低行樂幾曾過柳市卜

居誰為買花溪春風羽翼如乘便故里聽鶯北
固西

義僕行

有序

方修齡

韓斌為福建守備時耿藩叛逼降之斌不
從逆因假謀者言韓氏家且族斌不疑乃
為逆効命浙督李公患之執斌子晉為質
今以計歸其父蒼頭苑亮慨然納書於履
行至閩為邏者所獲斌所壁遺履而去
斌收履得書知家無恙乘夜策馬北走及

追至我兵嚴陣待戰追者返而亮已就烹
矣義哉此僕歌以表之

荊州家世本清高學書學劍學龍韜馬稍清談
推第一功名指顧擁旌旄一從丹詔金門下駐
節三溪撼海濤廝養苑亮八尺軀才武誰竒薛
與毛俛首給役惟薪水碌碌尋常甘下曹杜鵑
夜啼天津渡海上烽烟白日暮羽檄踏碎鼓鼙
聲骨肉兩地莫相顧將軍誓死不從逆那知逆
許多詒誤傳來故國已無家血淚洒向白雲路

少卿齟齬受降城滿腔幽憤憑誰訴金鼓聲壓
錢塘江白髮紅顏日徬徨將軍有子方總角執
令還父免殺傷可憐南北死生隔轅門號令嚴
如霜賴有崑崙饒膽智慷慨致身主人事奮臂
龍潭寄手書書藏破履珍緘秘揮手登車馬如
龍擊筑高歌起悲風紅日光催白虹死就縛遺
履真英雄將軍得書淚如雨國恩浩蕩足千
古爲項爲劉勝負分肝腦肯爲重墮努夜深飛
馬渡巖關北風颭颭愴愁顏回首遙望追兵急

我師接救歸家山父子相逢如夢寐壯士一去
不復還含笑解衣入鼎鑊流膏滿地土花斑將
軍歸來棲金谷銀燭高燒錦圍簇風雨瀟瀟天
柱峯隱隱如聞冤鬼哭我勸爾鬼不須悲大義
炳如日月垂男兒不作身後名年如老彭亦奚
爲

小圃雜蒔藥草偶成

薛蕙

修道那能飯一麻延年聊欲餌丹砂青繒齋去
尋三秀玉盃盛來服九華身寄人間長厭世夢

遊天上已爲家會追姑射乘雲氣不用羲和駐
日車

譙樓

蔡必達

長看明月照譙樓誰起樵樓對月幽古塚蕭涼
埋霸業秋花慘淡見荒邱數聲鼓角當年壯滿
耳虫蟄此夜愁不信變遷抔土盡生前父子薄
封侯

亳州志跋

余家世居山右自先世宦
遊中州始居於亳遂爲亳
人迄今將百載矣凡亳之
前賢往哲懿行嘉言每讀

舊誌輒低徊慕之而不能
置粵稽順治辛丑雖經修
輯其中考核未當缺畧尤
多且相沿日久陳編就蠹
往蹟將湮居斯地者能不

目擊而心驚乎余自癸卯
解組歸里自分衰朽不能
有爲杜門課子外事不敢
過問獨輯志書則耿耿於
衷而不忘也顧勦其成者

在邦人主其事者在守牧
而邇來之官是土者或鞅
掌之未遑或遷調之無定
如前太守尤公拔世盧公
見曾俱議纂修旋卽陞遷

未竟所志歲丙辰華公度
下車伊始卽欲修之諸紳
士無不勇往從事踰年誌
告竣正訂前書續增後事
未當者考核而精詳缺畧

者搜羅而補輯纂言紀事
網舉目張披閱之下明如
指掌矣夫亳與中州接壤
民人質直風氣淳厚鍾靈
毓秀賢喆代生秦漢以前

無論已魏晉而下若夏侯
氏之孝友陳圖南之性理
魯叅政之忠直薛考功之
議禮李方伯之勲猷皆古
今所稀少桑梓之典型今

一展卷其風穆然其人如在覩遺文而思振興景前賢而勤則倣則毫之偉人傑士將濟濟其日出矣是華公之修輯爲功於毫者

甚鉅而余以衰老之年幸從諸同人後共勤盛舉質之素心其亦差堪自慰也夫戊午孟冬里人劉思沛跋

亭州志

賦

五

圖

